

四庫全書薈要

• 乾隆御覽本

集部

欽定四庫全書薈要

集部  
詞綜卷  
五四

詳校官編修臣繆晉



詞綜卷四

翰林院檢討朱彝尊編

宋詞六十七首

徽宗皇帝 二首

高宗皇帝 一首

徐昌圖 一首

潘閬 三首

夏竦 一首

寇準 三首

王禹偁 一首

錢惟演 一首

晏殊 八首

賈昌朝 一首



王琪二首

林逋二首

李遵勗一首

葉清臣一首

聶冠卿一首

李師中一首

韓琦一首

范仲淹三首

宋祁二首

鄭獬一首

韓縝一首

張昇一首

謝絳一首

歐陽脩二十一首

梅堯臣一首

石延年一首

司馬光

一首

王安石

二首

范純仁

一首

徽宗皇帝

探春令

簾旌微動悄寒天氣龍池冰泮杏花笑吐香猶淺又還是春將半清歌妙舞從頭按等芳時開宴記去年對著東風曾許不負鶯花願

燕山亭

見杏花作

裁剪冰綃輕疊數重冷淡胭脂勻注新樣靚妝艷溢香  
融羞殺藥珠宮女易得凋零更多多少無情風雨愁苦間  
院落淒涼幾番春暮憑寄離恨重重這雙燕何曾會  
人言語天遙地遠萬水千山知他故宮何處怎不思量  
除夢裏有時曾去無據和夢也有時一作新來不做

高宗皇帝

漁父詞

水涵微雨湛虛明小笠輕蓑未要晴明鏡裏縠紋生白

鷺飛來空外聲

廖瑩中江行雜錄云漁父詞清新簡遠雖古之騷人詞客老於江湖擅名一時

者不能全及

徐昌圖

莆陽人太祖時守國子博士累遷殿中丞

臨江仙

飲散離亭西去浮生長恨飄蓬回頭烟柳漸重重淡雲  
孤鴈遠寒日暮天紅今夜畫船何處潮平淮月朦朧  
酒醒人靜奈愁濃殘燈孤枕夢輕浪五更風

潘閔

字道遙大名人太宗朝賜進士第坐事適中條山後收繫得釋以為滁州參軍有詞一卷

酒泉子

長憶孤山山在湖心如黛簇僧房四面向湖開輕棹去  
還來芰荷香細連雲閣閣上清聲簷下鐸別來塵土  
汚人衣空役夢魂飛

山陰陸子通云句法清  
古語帶烟霞近時罕及

又

長憶西湖靈隱寺前天竺後冷泉亭上幾曾遊三伏似  
清秋白猿時見攀高樹長嘯一聲何處去別來幾向  
畫圖看終是欠峯巒



又

長憶西湖湖水上盡日憑欄樓上望三三兩兩釣魚舟  
島嶼正清秋 笛聲依約蘆花裏白鳥成行忽驚起別

來閒想整綸竿思入水雲寒

古今詞話云石曼卿見此詞使畫工繪之作圖又湘

山云錢希白愛之  
自書玉堂屏風

夏 竦

字子喬德安人舉賢良方正慶厯中同中書  
門下平章事判大名府召入為宰相改樞密

使封英國公進鄭國公卒贈太師中書令謚  
文正劉敞言竦姦邪謚為正不可改謚文莊

有集

喜遷鶯令

宮詞

霞散綺月垂鈎簾卷未央樓夜涼銀漢截天流宮闕鎖  
清秋 瑤臺樹金莖露鳳髓香盤烟霧三千珠翠擁宸  
遊水殿按涼州

寇準

字平仲下邳人太平興國中進士累官尚書右僕射集賢殿大學士景德中同中書門下平章事封萊國公為丁謂所構乾興初貶雷州司戶參軍卒贈中書令謚忠愍有巴東集

點絳脣

小陌輕寒社公雨足東風慢定巢新燕濕雨穿花轉

象尺薰爐拂曉停針線愁蛾淺飛紅零亂側卧珠簾捲  
江南春

波渺渺柳依依孤村芳草遠斜日杏花飛江南春盡離  
腸斷蘋滿汀洲人未歸

陽關引

塞草烟光濶渭水波聲咽春朝雨霽輕塵斂征鞍發指  
青青楊柳又是輕攀折動黯然知有後會甚時節更  
盡一杯酒歌一闋歎人生裏難歡聚易離別且莫辭沉

醉聽取陽關徹念故人千里自此共明月

王禹偁

字元之鉅野人太平興國八年進士第累知制誥入翰林為學士咸平初出守黃州徙蘄州卒有

小畜集

點絳脣

雨恨雲愁江南依舊稱佳麗水村漁市一縷孤烟細

天際征鴻遙認行如綴平生事此時凝睇誰會憑欄意

錢惟演

字希聖吳越王俶之子少補牙門將歸宋為右屯衛將軍累遷樞密使罷為鎮國軍節度觀察留後改保大軍節度使知河陽入朝加同中書門下平章事生擅議宗廟且與后家

通昏落平章事為崇信軍節度使歸  
鎮卒諡曰思改諡文僖有擁旄集

### 玉樓春

城上風光鶯語亂城下烟波春拍岸綠楊芳草幾時休  
淚眼愁腸先已斷情懷漸變成衰晚鸞鏡朱顏驚暗

換昔年多病厭芳樽今日芳樽惟恐淺

黃叔暘云此暮年作詞極悽惋

晏殊

字同叔臨川人景祐二年同進士出身康定間拜集賢殿學士同中書門下平章事兼樞

密使卒贈司空兼侍中諡元獻有珠玉詞一卷

晁无咎云元獻不蹈襲人語而風調閑雅如舞低楊柳樓心月歌盡桃花扇底風知此人

不住三家村也  
劉貢父云元獻尤喜  
馮延巳歌詞其所自作亦不減延巳

# 破陣子

燕子來時新社  
梨花落後清明  
池上碧苔三四點  
葉底黃鸝一兩聲  
日長飛絮輕  
巧笑東鄰女  
伴采桑徑裏  
逢迎疑怪  
昨宵春夢好  
元是今朝鬪草羸  
笑從雙臉生

## 清平樂

金風細細  
葉葉梧桐墜  
綠酒初嘗人易醉  
一枕小窗濃睡  
紫薇朱槿初殘  
斜陽却照闌干  
雙燕欲歸時  
節銀

屏昨夜微寒

又

紅箋小字說盡平生意  
鴻鴈在雲魚在水  
惆悵此情難寄  
斜陽獨倚西樓遙  
山恰對簾鉤  
人面不知何處綠  
波依舊東流

踏莎行

碧海無波瑤臺有路  
思量便合雙飛去  
當時輕別意中  
人山長水遠知何處  
綺席凝塵香閨掩霧  
紅箋小字

憑誰附高樓目盡欲黃昏梧桐葉上蕭蕭雨

又

小徑紅稀芳郊綠遍高臺樹色陰陰見春風不解禁楊  
花濛濛亂撲行人面翠葉藏鶯珠簾隔燕爐香靜逐  
遊絲轉一場愁夢酒醒時斜陽却照深深院

蝶戀花

檻菊愁烟蘭泣露羅幙輕寒燕子雙飛去明月不諳離  
別苦斜光到曉穿朱戶昨夜西風凋碧樹獨上高樓



望盡天涯路欲寄彩鸞無尺素山長水濶知何處

清商怨

關河愁思望處滿漸素秋向晚鴈過南雲行人回淚眼  
雙鸞衾裯悔展夜又永枕孤人遠夢未成歸梅花聞  
塞管

相思兒令

昨日探春消息湖上綠波平無奈遶堤芳草還向舊痕  
生有酒且醉瑤觥更何妨檀板新聲誰教楊柳千絲

就中牽繫人情

賈昌朝

字子明，獲鹿人。天禧中進士，累拜同中書門下平章事，無侍中封。許國公進，魏國公卒，謚。

文元

有集

木蘭花令

都城水淥嬉遊處，仙棹往來人。  
笑語紅隨遠浪，泛桃花。  
雪散平堤飛柳絮，東君欲共春歸去。  
一陣狂風和驟雨，  
碧油紅旆錦障泥。  
斜日畫橋芳草路。

黃叔暘云：文元公平生惟賦此。

一詞極有風味

王

琪

字君玉華陽人舉進士歷官知制誥加樞密直學士以禮部侍郎致仕陳輔之云君玉有望江南十首自謂謫仙荆公酷愛其紅綃香潤入梅天之句

望江南

江南雨風送滿長川碧瓦烟昏沉柳岸紅綃香潤入梅  
天飄灑正蕭然朝與暮長在楚峯前寒夜愁歌金帶  
枕春江深閉木蘭船烟渚遠相連

又

江南岸雲樹半晴陰帆去帆來天亦老潮生潮落日空

沉南北別離心  
興廢事千古一沾襟  
山下孤烟漁市  
遠柳邊疎雨酒家深  
行客莫登臨

林通

字君復錢塘人結廬孤山二十年足不及城  
市真宗賜以粟帛詔長史歲時勞問既卒仁

宗賜謚和靖  
先生有集

霜天曉角

梅

冰清霜潔昨夜梅花發  
甚處玉龍三弄聲搖動枝頭月  
夢絕金獸熱曉寒蘭燼滅  
要捲珠簾清賞且莫掃堦

前雪

點絳脣 草

金谷年年亂生春色誰為主  
餘花落處滿地和烟雨  
又是離歌一闋長亭暮  
王孫去萋萋無數南北東西路

李遵勗

字公武崇矩孫第進士尚荆國大長公主授左龍武軍副馬都尉累遷寧國軍節度使徙鎮國軍知許州卒贈中書令諡和文有閑宴集

滴滴金

帝城五夜宴遊歇  
殘燈外看殘月都來猶在醉鄉中聽  
更漏初徹  
行樂已成閒話說如春夢覺時節  
大家同

約探春行問甚花先發

葉清臣

字道卿長洲人天聖初進士歷官翰林學士權三司使罷知河陽卒贈左諫議大夫有集

賀聖朝

滿斟綠醕留君住莫匆匆歸去三分春色二分愁更一分風雨  
花開花謝都來幾許且高歌休訴不知來歲牡丹時再相逢何處

聶冠卿

字長孺新安人舉進士慶曆中入翰林為學士判昭文館兼侍讀學士有蘄春集

多麗

李良定席上賦

想人生美景良辰堪惜向其間賞心樂事古來難是并  
得況東城鳳臺沁苑泛晴波淺照金碧露洗華桐烟霏  
絲柳綠陰搖曳蕩春一色畫堂迴玉簪瓊佩高會盡詞  
客清歡久重燃絳蠟別就瑤席有飄若驚鴻體態暮

為行雨標格逞朱脣緩歌妖麗似聽流鶯亂花間慢舞

縈回嬌鬟低暎腰肢纖細困無力忍分散彩雲歸後何

處更尋覓休辭醉明月好花莫謾輕擲

黃叔暘云冠卿詞不多見如此

篇亦可謂才情富麗矣其露洗華桐四句又所謂玉中之  
之珠璧珠中之夜光每一觀之撫玩無斂胡元任云露

洗華桐二語此是仲春天氣下乃云綠陰  
搖曳蕩春一色其時未有綠陰亦語病也

李師中

字誠之楚丘人中進士科仁宗朝權主管經  
畧司文字提點廣西刑獄歷天章閣待制河  
東都轉運使貶和州團練  
副使安置遠右司郎中

菩薩蠻

子規啼破城樓月畫船曉載笙歌發兩岸荔枝紅萬家  
烟雨中佳人相對泣淚下羅衣濕從此信音稀嶺南  
無鴈飛

韓

琦

字稚圭安陽人天聖中進士嘉祐初同中書門  
下平章事集賢殿大學士遷昭文館大學士封



儀國公進封衛國公再進魏國公拜右僕射卒  
贈尚書令謚忠獻徽宗追贈魏郡王有安陽集  
吳虎臣云魏公皇祐初鎮揚州撰維揚好四  
章所謂二十四橋千步柳春風十里上珠簾  
者是也其後罷相出鎮安陽復作安陽好詞十章

### 點絳脣

病起懨懨庭前花影添憔悴亂紅飄砌滴盡真珠淚

惆悵前春誰向花前醉愁無際武陵凝睇人遠波空翠

范仲淹

字希文吳縣人大中祥符八年進士仕至樞密副使參知政事卒贈兵部尚書楚國公謚

文正

有集

蘇幕遮

碧雲天紅葉地秋色連波波上寒烟翠山映斜陽天接  
水芳草無情更在斜陽外黯鄉魂追旅思夜夜除非  
好夢留人睡明月樓高休獨倚酒入愁腸化作相思淚

御街行

紛紛墜葉飄香砌夜寂靜寒聲碎真珠簾捲玉樓空天  
澹銀河垂地年年今夜月華如練長是人千里愁腸  
已斷無由醉酒未到先成淚殘燈明滅枕頭歌譜盡孤

眠滋味都來此事眉間心上無計相迴避

漁家傲

塞下秋來風景異衡陽鴈去無留意四面邊聲連角起  
千嶂裏長烟落日孤城閉濁酒一杯家萬里燕然未  
勒歸無計羌管悠悠霜滿地人不寐將軍白髮征夫淚

宋

祁

字子京安州安陸人徙開封之雍丘天聖中進士累官翰林學士承旨卒贈尚書諡景文

有出麾小集西洲猿稿李端叔云宋景文歐陽永叔以餘力遊戲而風流閑雅超出意表

好事近

睡起玉屏風吹去亂紅猶落天氣驟生輕暖襯沉香帷箔  
珠簾約住海棠風愁拖兩眉角昨夜一庭明月冷  
秋千紅索

浪淘沙

別劉  
原父

少年不管流光如箭因循不覺韶華換到如今始惜月  
滿花滿酒滿扁舟欲解垂楊岸尚同歡宴日斜歌闋  
將分散倚蘭橈望水遠天遠人遠

鄭

獬

字穀夫安陸人皇祐五年舉進士第累官翰林學士生不肯用按問新法王安石惡之出

為侍讀學士知杭州  
徙青州有鄭溪集

### 好事近

江上探春回正值早梅時節兩行小槽雙鳳按涼州初  
徹謝娘扶下繡鞍來紅靴踏殘雪歸去不須銀燭有  
山頭明月

韓

縝

字玉汝雍丘人第進士累官大中大夫知樞  
密院事拜尚書右僕射兼中書侍郎以太子

太保致仕贈司空

崇國公諡莊敏

芳草

即鳳  
蕭吟

鎖離愁連綿無際來時陌上初熏繡幃人念遠暗垂珠  
露泣送征輪長行長在眼更重重遠水孤雲但望極樓  
高盡日目斷王孫消魂池塘別後曾行處綠妒輕裙  
恁時携素手亂花飛絮裏緩步香茵朱顏空自改向年  
年芳意長新遍綠野嬉遊醉眼莫負青春

張昇

字景卿韓城人第進士累官參知政事以彰  
信軍節度使同中書門下平章事判許州改  
鎮河陽以太子太師致仕  
贈司徒兼侍中諡康節

離亭燕

一帶江山如畫風物向秋瀟灑水浸碧天何處斷霽色  
冷光相射蓼嶼荻花洲掩映竹籬茅舍雲際客帆高  
挂烟外酒旗低亞多少六朝興廢事盡入漁樵閒話悵  
望倚層樓寒日無言西下

謝

絳

字希深富陽人舉進士歷官兵部員外郎擢  
知制誥判吏部流內銓太常禮院出知鄧州

有集

夜行船

昨夜佳期初共鬢雲低翠翹金鳳尊前和笑不成歌意

偷傳眼波微送 草草不容成楚夢  
漸寒深翠簾霜重  
相看到斷腸時月西斜畫樓鐘動

歐陽修

字永叔廬陵人第進士歷官禮部侍郎兼翰林侍讀學士拜樞密副使叅知政事以太子

少師致仕卒贈太子太師諡文忠有六一居士詞三卷

陳質齋云歐陽公詞多有與花間陽春相混亦有鄙褻之語則其中當是仇人無名子所為也 羅長源云公嘗致意於詩為之本義溫柔寬厚所得深矣今詞之淺近者前輩多謂是劉焯偽作又云元豐中崔公度跋馮延巳陽春錄謂其間有誤入六一詞者今柳三變詞亦有雜之平山集中則其浮艷者殆亦非皆公少作也



# 摸魚兒

卷繡簾梧桐院落一霎雨添新綠小池閒立殘妝淺向  
晚水紋如澌凝遠目恨人去寂寥鳳枕孤難宿倚欄不  
足看燕拂風簷蜨翻露草兩兩鎮相逐雙眉蹙可惜  
年華婉婉西風初弄庭菊況伊家年少多情未已難拘  
束那堪更趁涼景追尋甚處垂楊曲佳期過盡但不說  
歸來多應忘了雲屏去時祝

按後半闕較他  
集未協疑有誤

## 采桑子

輕舟短棹西湖好  
淥水逶迤芳草長堤隱隱笙歌處處  
隨無風水面琉璃滑  
不覺船移微動漣漪驚起沙禽  
掠岸飛

又

羣芳過後西湖好  
狼籍殘紅飛絮濛濛垂柳闌干盡日  
風笙歌散盡遊人去  
始覺春空垂下簾櫳雙燕歸來  
細雨中

踏莎行

候館梅殘溪橋柳細草熏風暖  
搖征轡離愁漸遠漸無窮  
迢迢不斷如春水  
寸寸柔腸盈盈粉淚樓高莫近危欄倚  
平蕪盡處是春山行人更在春山外

蝶戀花

越女採蓮秋水畔  
窄袖輕羅暗露雙金釧  
照影摘花花似面  
芳心只共絲爭亂  
鵝鶩灘頭風浪晚  
霧重烟輕不見來時伴  
隱隱歌聲歸棹遠  
離愁引著江南岸

又

小院深深門掩乍

一作亞

寂寞珠簾畫閣重重下欲近禁

烟微雨罷綠楊深處秋千挂傳粉狂遊猶未捨不念

芳時看黛無人畫薄倖未歸春去也杏花零落紅香謝

### 玉樓春

春山斂黛低歌扇暫解吳鉤登祖宴畫樓鐘動已魂銷  
何況馬嘶芳草岸青門柳色隨人遠望未斷時腸已  
斷洛陽春色待君來莫到落花飛似霰

又

湖邊柳外樓高處望斷雲山多少路闌干倚遍使人愁  
又是天涯初日暮輕無管繫狂無數水畔飛花風裏  
絮算伊渾似薄情郎去便不來來便去

又

西湖南北烟波濶風裏絲簫聲韻咽舞餘一作徐裙帶綠  
雙垂酒入香腮紅一抹杯深不覺琉璃滑貪看六么  
花十八明朝車馬各東西惆悵畫橋風與月

虞美人影

鶯愁燕苦春歸去寂寂花飄紅雨  
碧草綠楊岐路況是  
長亭暮少年作客情難訴  
泣對東風無語目斷兩三  
烟樹翠隔江淹浦

浪淘沙

把酒祝東風且共從容垂楊紫陌  
洛城東總是當時攜手處  
遊遍芳叢聚散苦息息此恨無窮  
今年花勝去年紅可惜  
一作料得明年花更好知與誰同

又

今日北池遊漾漾輕舟波光潋灩柳條柔如此春來春  
又去白了人頭好妓好歌喉不醉難休勸君滿滿酌  
金甌總使花時常病酒也是風流

浣溪沙

堤上遊人逐畫船拍堤春水四垂天綠楊樓一作梢外出

秋千白髮戴花君莫笑六么催拍盞頻傳人生何處

似尊前晁無咎云只一出字自是後人道不到

又

紅粉佳人白玉盃  
木蘭船穩棹歌催  
綠荷風裏笑聲來  
細雨輕烟籠草樹  
斜橋曲水遶樓臺  
夕陽高處畫屏開

越溪春

三月十三寒食日  
春色遍天涯  
越溪閨苑繁華地  
傍禁垣  
珠翠烟霞紅粉牆頭秋  
千影裏臨水人家  
歸來晚  
駐香車銀箭透窗紗  
有時三點兩點雨  
霽朱門柳細風斜  
沉麝不燒金鴨  
玲瓏月照梨花



夜行船

滿眼東風飛絮催行色短亭春暮落花流水草連雲看  
看是斷腸南浦檀板未終人去一作又去扁舟在綠楊  
深處手把金樽難為別更那聽亂鶯疎雨

少年遊草

闌干十二獨凭春晴碧遠連雲千里萬里二月三月行  
色苦愁人謝家池上江淹浦畔吟魄與離魂那堪疎  
雨滴黃昏更特地憶王孫吳虎臣云不惟君復聖俞二  
詞不及雖求諸唐人溫李集

中殆與之  
為一笑

南歌子

鳳髻金泥帶，龍紋玉掌梳。  
去來窗下笑相扶。  
愛道畫眉深淺入時無。  
弄筆偎人久，描花試手初。  
等閒妨了繡工夫。  
笑問雙鴛鴦，字怎生書。

臨江仙

柳外輕雷池上雨，雨聲滴碎荷聲。  
小樓西角斷虹明。  
闌干倚處，待得月華生。  
燕子飛來窺畫棟，玉鈎垂下簾。

旌涼波不動簾紋平水精雙枕傍有墮釵橫

又

記得金鑾同唱第春風上國繁華如今薄宦老天涯十  
年岐路空負曲江花 聞說閬山通閬苑樓高不見君  
家孤城寒日等閒斜離愁難盡紅樹遠連霞

青玉案

一年春事都來幾早過了三之二綠暗紅嬌渾可事垂  
楊庭院暖風簾幙有箇人憔悴 買花載酒長安市又

爭似家山見桃李不住東風吹客淚相思難表夢魂無  
據惟有歸來是

梅堯臣

字聖俞宣城人初以蔭為河南主簿歷鎮安判官仁宗召試賜進士出身為國子監直講遷都官員外郎有宛陵集

蘇幕遮

草

露堤平烟墅杳亂碧萋萋雨後江天曉獨有庾郎年最  
少窄地春袍嫩色宜相照接長亭迷遠道堪怨王孫  
不記歸期早落盡梨花春又了滿地殘陽翠色和烟老

石延年

字曼卿宋州人補三班奉職累遷大理寺丞通判海州終校理

燕歸梁

芳草年年惹恨幽想前事悠悠傷春傷別幾時休算從  
古為風流春山總把深勻翠黛千疊在眉頭不知供  
得幾多愁更斜日凭危樓

司馬光

字君實夏縣人寶元初中進士甲科累官資政殿學士尚書左僕射兼門下侍郎贈太師

溫國公諡文正

阮郎歸

漁舟容易入深山仙家日日閒綺窗紗幌映朱顏相逢  
醉夢間松露冷海霞殷息息整棹還落花寂寂水潺潺  
潺重尋此路難

王安石

字介甫臨川人舉進士熙寧初同中書門下  
平章事封舒國公加司空卒贈太傅諡曰文  
宗寧中追封舒王

有臨川集詞一卷

桂枝香

金陵懷古

登臨送目正故國晚秋天氣初肅千里澄江似練翠峰  
如簇征帆去棹殘陽裏背西風酒旗斜矗綠舟雲淡星

河鷺起圖畫難足  
念自昔豪華競逐歎門外樓頭悲  
恨相續千古憑高對此謾嗟榮辱六朝舊事隨流水但  
寒烟衰草凝綠至今商女時時猶唱後庭遺曲

傷春怨

夢中作

雨打江南樹一夜花開無數綠葉漸成陰下有遊人歸  
路與君相逢處不道春將暮把酒祝東風且莫恁息  
息去

范純仁

字堯夫仲淹子第進士累官尚書右僕射  
兼中書侍郎贈開府儀同三司諡忠宣

鷓鴣天

和韓持國

臘後春前暖律催  
日和風暖欲開梅  
公方結客尋佳景  
我亦忘形趁酒杯  
添管籥續尊壘  
更闌秉燭未能回  
清歡莫待相期約  
乘興來時便可來

詞綜卷四



詞綜卷五

翰林院檢討朱彝尊編

宋詞七十首

晏幾道

二十首

張

先

二十首

柳永

二十一首

晏幾道

字叔原殊幼子監穎昌許田鎮有小山詞一卷

黃魯直云叔原樂府寓以詩人句法精壯頓挫動搖人心合者高唐洛神之流下者不減桃葉團扇程叔微云伊川聞誦叔原夢魂慣得無拘檢又踏楊花過謝橋笑曰鬼語也意亦賞之

臨江仙

夢後樓臺高鎖酒醒簾幕低垂去年春恨却來時落花  
人獨立微雨燕雙飛記得小蘋初見兩重心字羅衣  
琵琶絃上說相思當時明月在曾照綵雲歸

清商怨

庭花香信尚淺最玉樓先暖夢覺香衾江南依舊遠  
迴文錦字暗剪謾寄與也應歸晚要問相思天涯猶自短

點絳脣

明日征鞭又將南陌垂楊折自憐輕別攔得音塵絕  
杏子枝邊倚徧闌干月依前缺去年時節舊事無人說  
又

妝席相逢旋勻紅淚歌金縷意中曾許欲共吹花去  
長愛荷香柳色殷橋路留人住淡烟微雨好箇雙棲處  
虞美人

閒敲玉鐙隋堤路一笑開朱戶素雲凝澹月嬋娟門外  
鴨頭春水木蘭船吹花拾蕊嬉遊慣天與相逢晚一

聲長笛倚樓時應恨不題紅葉寄相思

生查子

金鞍美少年去躍青驄馬  
縈繫玉樓人繡被春寒夜  
消息未歸來寒食梨花謝  
無處說相思背面秋千下

採桑子

秋千散後朦朧月滿院  
人間幾處雕欄一夜風吹杏粉殘  
昭陽殿裏春衣就金縷初乾  
莫信朝寒明日花前試舞看  
六么令

綠陰春盡飛絮遠香閣晚來翠睂宮樣巧把遠山學一  
寸狂心未說已向橫波覺畫簾遮面新翻曲妙暗許閒  
人帶偷掐前度書多隱語意淺愁難答昨夜詩有回  
文韻險還慵押都待笙歌散了記取留時霎不消紅蠟  
閒雲歸後月在庭花舊欄角

又

雪殘風信悠颺春消息天涯倚樓新恨楊柳幾絲碧還  
是南雲雁少錦字無端的寶釵瑤席彩絃聲裏擲作尊

前未歸客 遙想疎梅此際月底香英圻別後誰繞前  
溪手揀繁枝摘莫道傷高恨遠付與臨風笛儘堪愁寂  
花時往事更有多情箇人憶

清平樂

留人不住醉解蘭舟去一棹碧濤春水路過盡曉鶯啼  
處 渡頭楊柳青青枝枝葉葉離情此後錦書休寄盡  
樓雲雨無憑

又

春雲綠處又見歸鴻去側帽風前花滿路冶葉倡條情  
緒紅樓桂酒初開曾携翠袖同來醉弄影蛾池水短  
簫吹落殘梅

又

波紋碧皺曲水清明後折得疎梅香滿袖暗喜春紅依  
舊歸來紫陌東頭金釵換酒銷愁柳影深深細路花  
梢小小層樓

又

么絃寫意意密絃聲碎書得鳳箋無限事猶恨春心難  
寄卧聽疎雨梧桐雨餘淡月朦朧一夜夢魂何處那  
回楊葉樓中

玉樓春

秋千院落重簾暮彩筆閑來題繡戶牆頭丹杏雨餘花  
門外綠楊風後絮朝雲信斷知何處應作襄王春夢  
去紫騮認得舊遊踪嘶過畫樓東畔路

又



採蓮時候慵歌舞永日閒從花裏度暗隨蘋末曉風來  
直待柳梢斜月去停撓共說江頭路臨水樓臺蘓小  
住細思巫峽夢回時不減秦源腸斷處

浪淘沙

小綠間長紅露蘂烟叢花開花落昔年同惟恨花前携  
手處往事成空山遠水重重一笑難逢已擗長在別  
離中霜鬢知他從此去幾度春風

碧牡丹

翠袖疎紈扇涼葉催歸燕一夜西風幾處傷高懷遠細  
菊枝頭開嫩香還徧月痕依舊庭院事何限悵望秋  
意晚離人鬢華將換靜憶天涯路比比情還短試約鸞  
箋傳素期良願南雲應有新鴈

蝶戀花

碧玉高樓臨水住紅杏開時花底曾相遇一曲陽春春  
已暮曉鶯聲斷朝雲去遠水來從樓下度過盡流波  
未得魚中素月細風尖垂柳渡夢魂長在分襟處

又

喜鵲橋成催鳳駕，天為歡時乞與初涼夜。乞巧雙蛾加  
意畫，玉鈎斜傍西南掛。分鈿擘釵涼葉下，香袖凭肩  
誰記當時話。路隔銀河猶可借，世間離恨何年罷。

又

醉別西樓醒不記，春夢秋雲聚散真容易。斜月半窗還  
少睡，畫屏間展吳山翠。衣上酒痕詩裏字，點點行行  
總是淒涼意。紅燭自憐無好計，夜寒空替人垂淚。

又

庭院碧苔紅葉遍金菊開時已近登高宴日日露荷凋  
綠扇粉塘烟水明如練試倚涼風醒酒面雁字來時  
恰向層樓見幾點護霜雲影轉誰家蘆管吹秋怨

破陣子

柳下笙歌庭院花間姊妹秋千記得青樓當日事寫向  
紅窗夜月前憑伊寄小蓮絳蠟等閒陪淚吳蠶到了  
纏綿綠鬢能供多少恨未肯無情比斷絃今年老去年

張

先

字子野吳興人為都官郎中有安陸集詞一卷

古今詩話云有客謂子野曰人皆謂公張三中即心中事眼中淚意中人也公曰何不目之為張三影客不曉公曰雲破月來花弄影嬌柔懶起簾櫳捲花影柳徑無人墮飛絮無影此余平生所得意也天聖間一時有兩張先皆字子野俱第進士其能詩壽考悉同一博州人號張三影者是也一吳興人見齊東野語胡應麟筆叢所載如此

清平樂

屏山斜展帳卷紅綃半泥淺曲池飛海燕風度楊花滿院  
雲愁雨恨空深覺來一枕春陰隴上梅花落盡江

南消息沉沉

卜算子慢

溪山別意烟樹去程日落采蘋春晚欲上征鞅更掩翠  
簾回面相盼惜彎彎淺黛長長眼奈盡閣歡遊也學狂  
花亂絮輕散 水影橫池館對靜夜無人月高雲遠一  
餉凝思兩眼淚痕還滿難遣恨私書又逐東風斷縱夢  
澤層樓萬尺望湖城那見

木蘭花

西湖楊柳風流絕滿縷青春看贈別牆頭簌簌暗飛花  
山外陰陰初落月秦姬穠麗雲梳髮持酒聽歌留晚  
發驪駒應亦解人情欲出重城嘶不歇

又

邠州作

青銅貼水萍無數臨曉西湖春漲雨泥新輕燕面前飛  
風慢落花衣上住紅裙空解烟蛾聚雲月却能隨馬  
去明朝何處上高臺回認玉峯山下路

又

去春自湖歸杭憶南園花已開有當時猶有藥  
如梅之句今歲還鄉南園正盛復為此詞以寄

意

去年春入芳菲國青藥如梅終忍摘欄邊徒欲說相思  
綠蠟密緘朱粉飾歸來故苑重尋覓花滿舊枝心更  
惜鴛鴦從小自相雙若不多情頭不白

又

乙卯吳興寒食

龍頭舴艋吳兒競筍柱鞦韆遊女並芳洲拾翠暮忘歸  
秀野踏青來不定行雲去後遙山暝已放笙歌池院  
靜中庭月色正清明無數楊花過無影



憶秦娥

參差竹吹斷相思曲情不足西北有樓窮遠目  
憶昔溪寒影透清玉秋鴈南飛速菰草綠應下溪頭沙上宿  
慶春澤

飛閣危橋相倚人獨立東風滿衣輕絮還記憶江南如  
今天氣正白蘋花遶堤漲流水寒梅落盡誰寄方春  
意無窮青空千里愁草樹依依闕城初閉對月黃昏角  
聲傍烟起

山亭宴

有美堂贈  
序獻主人

宴堂永晝喧簫鼓倚青空畫欄紅柱玉瑩紫微人藹和  
氣春融日煦故宮池館更樓臺約風月今宵何處湖水  
動鮮衣競拾翠湖邊路落花蕩漾怨空樹曉山靜數  
聲杜宇天意送芳菲正黯淡疎烟短雨新歡寧似舊歡  
長此會散幾時還聚試為挹飛雲問解相思否

剪牡丹

舟中聞  
雙琵琶

野綠連空天青垂水素色溶漾都淨柔柳搖搖墜輕絮

無影汀洲日落人歸脩巾薄袂擷香拾翠相競如解凌  
波泊渚烟春暝 綵縵朱索新整宿繡屏畫船風定金  
鳳響雙槽彈出今古幽思誰省玉盤大小亂珠迸酒上  
妝面花艷媚相並重聽盡漢妃一曲江空月靜

好事近

和穀夫內  
翰梅花

月色透橫枝短葉小葩無力北客一聲長笛怨江南先  
得誰教強半臘前開多情為春憶留取大家須醉幸  
雨休風息

畫堂春

外湖蓮子長參差，霽山青處鷗飛。  
水天溶漾，畫橈遲人，影鑑中移。  
桃葉淺聲雙唱，杏紅深色輕衣。  
小荷障面，避斜暉，分得翠陰歸。

踏莎行

衾鳳猶溫，籠鸚尚睡，宿妝稀淡，眉成字。  
映花避月上，迴廊珠裙摺摺輕垂地。  
翠幙成波，新荷貼水，紛紛烟絮。  
低還起，重牆遶院，更重門，春風無路通深意。

于飛樂

寶奩開菱鑑淨一掬清蟾新妝臉旋學花添蜀紅衫雙  
繡蝶裙縷鶻鶻尋思前事小屏風仍畫江南怎空教  
草解宜男柔桑暗又過春蠶正陰晴天氣更暝色相兼  
幽期消息曲房西碎月篩簾

惜瓊花

汀蘋白茗水碧每逢花駐樂隨處歡席別時携手看春  
色螢火而今飛破秋夕河流如帶窄任輕似葉何計

歸得斷雲孤鶩青山極樓上徘徊無盡相憶

河滿子

陪杭守泛  
湖夜歸

溪女送花隨處沙鷗避樂分行遊舸已如圖障裏小屏  
猶畫瀟湘人面新生酒艷日痕更欲春長衣上交枝  
鬪色釵頭比翼相雙片段落霞明水底風紋時動粧光  
賔從夜歸無月千燈萬火湖塘

醉垂鞭

錢塘送  
祖擇之

酒面灩金魚吳娃唱吳潮上玉殿白麻書待君歸後除

勾留風月好平湖曉翠峯孤此景出關無西州空畫  
圖

又

雙蜨繡羅裙東池宴初相見朱粉不深勻閒花淡淡春  
細看諸處好人人道柳腰身昨日亂山昏來時衣上  
雲

謝池春慢

玉仙觀道中  
逢謝媚卿

繚牆重院間有流鶯到繡被掩餘寒畫閣明新曉朱檻

連空濶飛絮無多少徑莎平池水渺日長風靜花影閒  
相照 塵香拂馬逢謝女城南道秀艷過施粉多媚生  
輕笑鬪色鮮衣薄碾玉雙蟬小歡難偶春過了琵琶流  
怨都入相思調

減字木蘭花

贈伎

垂螺近額走上紅裯初趁拍只恐驚飛擬倩游絲惹住  
伊 文鴛繡履去似風流塵不起舞徹梁州頭上宮花  
顫未休



醉落魄

美人吹笛

雲輕柳弱內家髻子新梳掠生香真色人難學橫管孤  
吹月淡天垂幕朱脣淺破櫻桃萼倚樓人在闌干角  
夜寒指冷羅衣薄聲入霜林款款驚梅落

師師令

贈美人

香鈿寶珥拂菱花如水學妝皆道稱時宜粉色有天然  
春意蜀綵衣長勝未起縱亂霞垂地都城池苑誇桃  
李問東風何似不須回扇障清歌脣一點小於朱纈正

值殘英和月墜寄此情千里

繫裙腰

惜霜澹照夜雲天  
朦朧影畫勾  
闌人情縱似長情月  
算一年年又能得幾番圓  
欲寄西江題葉字  
流不到五亭前  
東池始有荷新綠  
尚小如錢問何日藕幾時蓮

漁家傲

巴子城頭青草暮  
巴山重疊相逢處  
燕子占巢花脫樹  
杯且舉  
瞿塘水濶舟難渡  
天外吳門清雪路  
君家正

在吳門住贈我柳枝情幾許春滿縷為君將入江南去

碧牡丹

步障搖紅綺曉月墮沉烟砌緩板香檀唱徹伊家新製  
怨入睂頭斂黛峯橫翠芭蕉寒雨聲碎鏡華翳閒照

孤鸞戲思量去時容易鈿合瑤釵至今冷落輕棄望極

藍橋但暮雲千里幾重山幾重水

道山清話云晏文獻為京兆辟張先為通

判新納侍兒公甚屬意先能為詩詞公雅重之每張來  
令侍兒出侑觴往往歌子野所為之詞其後王夫人寢  
不容公即出之一日子野至公與之飲子野作此詞令  
營妓歌之至末句公聞之憮然曰人生行樂耳何自苦

如此亞命于宅庫支錢若干復取前  
所出侍兒既來夫人亦不復誰何也

青門引

乍暖還輕冷風雨晚來方定庭軒寂寞近清明殘花中  
酒又是去年病樓頭畫角風吹醒入夜重門靜那堪  
更被明月隔牆送過秋千影

生查子

彈箏

含羞整翠鬟得意頻相顧雁柱十三絃一一春鶯語  
嬌雲容易飛夢斷知何處深院鎖黃昏陣陣芭蕉雨

柳永

初名三變字耆卿樂安人景祐元年進士官至屯田員外郎有樂章集九卷

晁无咎云世言柳耆卿曲俗非也如漸霜風淒緊闌河冷落殘照當樓此真不減唐人語

李端叔云耆卿詞鋪叙展衍備足無餘較之花間所集韻終不勝孫敦立云耆卿詞

雖極工然多雜以鄙語葉少蘊云嘗見一西夏歸朝官云凡有井水飲處即能歌柳詞

吳虎臣云仁宗留意儒雅深斥浮艷虛華之文三變好為淫冶之曲傳播四方嘗有鶴

冲天詞云忍把浮名換了淺斟低唱及臨軒放榜時人語之曰且去淺斟低唱何要浮名

劉潛夫云耆卿有教坊丁大使意黃叔暘云耆卿長于纖艷之詞然多近俚俗陳

質齋云柳詞格不高而音律諧婉詞意妥帖承平氣象形容曲盡尤工于羈旅行役

鬪百花

照色韶光明媚輕靄低籠芳樹池塘淺蘸烟蕪簾幙閒  
垂風絮春困厭厭拋擲鬪草工夫冷落踏青心緒終日  
扃朱戶遠恨綿綿淑景遲遲難度年少傳粉依前醉  
眠何處深院無人黃昏乍拆鞦韆空鎖滿庭花雨

女冠子

斷烟殘雨灑微涼生軒戶動清籟蕭蕭庭樹銀河濃淡  
華星明滅輕雲時度莎階寂靜無覩幽蛩切切秋吟苦

疎簾一徑流螢幾點飛來又去  
對月臨風空恁無眠  
耿耿暗想舊日牽情處  
綺羅叢裏有人人  
那回飲散略  
略曾諧鴛侶  
因循忍便睽阻  
相思不得長相聚  
好天良夜無端惹起千愁萬緒

### 雨霖鈴

寒蟬淒切對長亭晚  
驟雨初歇  
都門帳飲無緒  
方留戀處  
蘭舟催發  
執手相看淚眼  
竟無語  
凝咽  
念去去千里烟波  
暮靄沉沉楚天濶  
多情自古傷離別  
更那堪冷落

落清秋節今宵酒醒何處楊柳岸曉風殘月此去經年  
應是良辰好景虛設便總有千種風情更與何人說

傾盃樂

木落霜洲鴈橫烟渚分明畫出秋色暮雨乍歇小楫夜  
泊宿葦村山驛何人月下臨風處起一聲羌笛離緒萬  
端聞岸草切切蛩吟如織為憶芳容別後水遙山遠  
何計憑鱗翼想繡閣深沉爭知憔悴損天涯行客楚峽  
雲歸高陽人散寂寞狂蹤跡望京國空目斷遠峯凝碧



卜算子慢

江楓漸老汀蕙半凋滿目敗紅衰翠楚客登臨正是暮  
秋天氣引疎砧斷續殘陽裏對晚景傷懷念遠新愁舊  
恨相繼脉脉人千里念兩處風情萬重烟水雨歇天  
高望斷翠峯十二儘無言誰會憑高意縱寫得離腸萬  
種奈歸鴻誰寄

少年

參差烟樹霸陵橋風物盡前朝衰楊古柳幾經攀折惟

悴楚宮腰 夕陽閒淡秋光老離思滿蘅皋一曲陽關  
斷腸聲盡獨自上蘭橈

夜半樂

凍雲黯淡天氣扁舟一葉乘興離江渚渡萬壑千巖越  
溪深處怒濤漸息樵風乍起更聞商旅相呼片帆高舉  
泛畫鷁翩翩過南浦望中酒旆閃閃一簇烟村數行  
霜樹殘日下漁人鳴榔歸去敗荷零落衰楊掩映岸邊  
兩兩三三浣紗遊女避行客含羞笑相語到此因念

繡閣輕拋浪萍難駐歎後約丁寧竟何據慘離懷空恨  
歲晚歸期阻凝淚眼杳杳神京路斷鴻聲遠長天暮

玉蝴蝶

望處雨收雲斷凭欄悄悄目送秋光晚景蕭疎堪動宋  
玉悲涼水風輕蘋花漸老月露冷梧葉飄黃遣情傷故  
人何在烟水茫茫難忘文期酒會幾辜風月屢變星  
霜海濶天遙未知何處是瀟湘念雙燕難憑遠信指暮  
天空識歸航黯相望斷鴻聲裏立盡斜陽

望遠行雪

長空降瑞寒，風剪淅淅瑤華初下。亂飄僧舍，密灑歌樓，迤邐漸迷鴛瓦。好是漁人披得一蓑歸去，江上晚來堪畫。滿長安，高却旗亭酒價。幽雅乘興最宜訪戴。泛小棹，越溪瀟灑。皓鶴奪鮮白鷗失素，千里廣鋪寒野。須信幽蘭歌斷，同雲收盡，別有瓊臺瑤榭。放一輪明月交光，清夜。

八聲甘州

對蕭蕭暮雨灑江天一番洗清秋  
漸霜風淒緊關河冷落殘照當樓  
是處紅衰綠減苒苒物華休惟有長  
江水無語東流不忍登高臨遠望故  
鄉渺邈歸思難收歎年來蹤跡何事  
苦淹留想佳人妝樓長望誤幾回天  
際識歸舟爭知我倚闌干處正恁凝  
愁

安公子

遠岸收殘雨雨殘稍覺江天暮  
拾翠汀洲人寂靜立雙鷗鷺  
望幾點漁燈掩映蒹葭浦  
停畫橈兩兩舟人語

道去程今夜遙指前村烟樹  
遊宦成羈旅短檣吟倚  
閒凝竚萬水千山迷遠近想鄉關何處自別後風亭月  
榭孤歡聚剛斷腸惹得離情苦聽杜宇聲聲勸人不如  
歸去

雪梅香

景蕭索危樓獨立

一作倚

面晴空動悲秋情緒當時宋玉

應同漁市孤烟杲寒碧水村殘葉舞愁紅楚天濶浪浸  
斜陽千里溶溶  
臨風想佳麗別後愁顏鎮斂看峯可

惜當年頓乖雨跡雲蹤雅態妍姿正歡洽落花流水忽  
西東無憐恨相思意盡分付征鴻

婆羅門令

昨宵裏恁和衣睡今宵裏又恁和衣睡小飲歸來初更  
過醺醺醉中夜後何事還驚起霜天冷風細細觸疎  
窗閃閃燈搖曳空牀展轉重追想雲雨夢任歌枕難繼  
寸心萬緒咫尺千里好景良天彼此空有相憐意未有  
相憐計

西平樂

盡日憑高寓目脉脉春情緒嘉景清明漸近時節輕寒  
乍暖天氣才晴又雨烟光滄蕩裝點平蕪遠樹黯凝佇  
臺榭好鶯燕語正是和風麗日幾許繁紅嫩綠雅稱  
嬉遊去奈阻隔尋芳伴侶秦樓鳳吹楚臺雲約空悵望  
在何處寂寞韶光暗度可堪向晚村落聲聲杜宇

陽臺路

楚天晚墜冷風敗葉疎紅零亂冒征塵匹馬區區愁見



水遙山遠追念年時正  
憇鳳幃倚香偎煖嬉遊慣又豈  
知前歡雲雨分散  
此際空勞回首望帝里難收淚眼  
暮烟衰草算暗鎖路歧無限  
今宵又依前寄宿甚處葦  
村山館寒燈半夜厭厭憑何消遣

二郎神

七夕

炎光初謝過暮雨芳塵輕灑  
乍露冷風清庭戶爽天如水  
玉鉤遙挂應是星娥嗟久阻  
叙舊約飈輪欲駕極目  
處微雲暗度耿耿銀河高瀉  
閑雅須知此景古今無

價運巧思穿鍼樓上女擡粉面雲鬟相亞鈿合金釵私  
語處算誰在回廊影下願天上人間占得歡娛年年今  
夜

訴衷情近

雨晴氣爽竚立江樓望處澄明遠水生光重疊暮山聳  
翠遙想斷橋幽徑隱隱漁村向晚孤烟起殘陽裏脉  
脉朱欄靜倚黯然情緒未飲先如醉愁無際暮雲過了  
秋風老盡故人千里竟日空凝睇

# 竹馬子

登孤壘荒涼危亭曠望靜臨烟渚對雌霓挂雨雄風拂  
檻微收煩暑漸覺一葉驚秋殘蟬噪晚素商時序覽景  
想前歡指神京非霧非烟深處向此成追感新愁易  
積故人難聚憑高盡日凝竚贏得銷魂無語極目霽靄  
霏微斷鴉零亂蕭索江城暮南樓畫角又逐殘陽去

## 玉山枕

驟雨新霽蕩原野清如洗斷霞散彩殘陽倒影天外雲

峯數朶相倚露莎烟  
艾蒲池塘見次第  
幾番紅翠當是時  
河朔飛觴避炎蒸  
想風流堪繼晚來  
高樹清風起動簾  
幙生秋氣畫樓晝  
寂蘭堂夜靜舞艷  
歌姝漸任羅綺訟  
閒時泰足風情便  
爭奈雅歡都廢省  
教成幾闋新歌盡  
新聲好尊前重理

河傳

淮岸漸晚圓荷向背  
芙蓉深淺仙娥畫  
舸露影紅芳交亂  
難分花與面采多  
乍覺輕舸滿呼歸  
伴急漿烟村

遠隱隱棹歌漸被蒹葭遮斷曲終人不見


木蘭花慢

清明

坼桐花爛熳乍疎雨洗清明正艷杏燒林緗桃繡野芳  
景如屏傾城盡尋勝賞驟雕鞍紺幃出郊坰風暖繁絃  
脆管萬家競奏新聲 盈盈鬪草踏青人艷冶遞逢迎  
向路傍往往遺簪墜珥珠翠縱橫歡情對佳麗地任金  
罍罄竭玉山傾揅却明朝永日畫堂一枕春醒



詞綜卷五



總校官庶吉士臣張能照  
校對官中書臣潘庭筠  
謄錄監生臣張德燾

欽定四庫全書薈要

集部  
詞綜卷六  
七

詳校官編修臣繆晉





詞綜卷六

翰林院檢討朱彞尊編

宋詞六十四首

蘇

軾

首十五

黃庭堅

四首

秦

觀

首十九

晁補之

首十五

張

耒

三首

陳師道

二首

李

廌

二首

李之儀

四首

蘇

軾

字子瞻眉山嘉祐初試禮部第一歷官翰林學士紹聖初安置惠州徙昌化元符初北

還卒於常州高宗即位贈資政殿學士  
復贈太師謚文忠有東坡居士詞二卷

晁无咎云居士詞人謂多不諧音律然橫放  
傑出自是曲子內縛不住者 陳無已云東

坡以詩為詞如教坊雷大使之舞雖極天下  
之工要非本色 陸務觀云世言東坡不能

歌故所作樂府詞多不協晁以道謂紹聖初  
與東坡別于汴上東坡酒酣自歌古陽關則  
公非不能歌但豪放不喜裁剪以就聲律耳  
又云東坡詞歌之曲終覺天風海雨逼人

周煇云豈無去國流離之思殊覺哀而不傷  
吹劔續錄云東坡在玉堂日有幕士善歌

因問我詞比柳耆卿何如對曰柳郎中詞只  
好十七八女孩兒按執紅牙拍歌楊柳岸曉  
風殘月學士詞須關西大漢執鐵綽板唱大  
江東去公為之絕倒 胡致堂云詞曲至東

坡一洗綺羅香澤之態擺脫綢繆宛轉之度  
使人登高望遠舉首高歌逸懷浩氣超乎塵  
垢之外於是花間為早隸而耆卿為興堂矣  
張叔夏云東坡詞清麗舒徐處高出人表  
周秦諸人  
所不能到

醉翁操

琴曲

琅然清園誰彈響空山無言惟翁醉中和其天月明風  
露娟娟人未眠荷蕢過山前曰有心也哉此賢 醉翁  
笑詠聲和流泉醉翁去後空有朝吟夜怨山有時而童  
巔水有時而回川思翁無歲年翁今為飛仙此意在人

間試聽徽外三兩絃

行香子

攜手江村梅雪飄裙情何限處處消魂故人不見舊曲  
重聞向望湖樓孤山寺湧金門尋常行處題詩千首  
繡羅衫與拂輕塵別來相憶知有何人有湖中月江邊  
柳隴頭雲

哨遍

睡起畫堂銀蒜押簾珠幕雲垂地初雨歇洗出碧羅天

正溶溶養花天氣一霎晴風迴芳草榮光浮動卷皺銀  
塘水方杏靨勻酥花鬚吐繡園林翠紅排比見乳燕梢  
蜨過繁枝忽一綫爐香惹遊絲晝永人間獨立斜陽晚  
來情味便携將佳麗乘興深入芳菲裏撥胡琴語輕  
攏慢撚總伶俐看緊約羅裙急趣檀板霓裳入破驚鴻  
起顰月臨眉醉霞橫臉歌聲悠颺雲際任滿頭紅雨落  
花飛漸鴉鵲樓西玉蟾低尚徘徊未盡歡意君看今古  
悠悠浮幻人間世這些百歲光陰幾日三萬六千而已

醉鄉路穩不妨行但人生要適情耳

賀新涼

乳燕飛華屋悄無人槐陰轉午晚涼新浴手弄生綃白  
團扇扇手一時似玉漸困倚孤眠清熱簾外誰來推繡  
戶枉教人夢斷瑤臺曲又却是風敲竹石榴半吐紅  
巾蹙待浮花浪藥都盡伴君幽獨穠艷一枝細看取芳  
意千重似束又恐被秋風驚綠若待得君來向此花前  
對酒不忍觸共粉淚兩簌簌

胡元任云  
托意高遠

水龍吟

和章質夫  
楊花韻

似花還似非花也無人惜從教墜拋家傍路思量却似  
無情有思縈損柔腸困酣嬌眼欲開還閉夢隨風萬里  
尋郎去處又還被鶯呼起不恨此花飛盡恨西園落  
紅難綴曉來雨過遺踪何在一池萍碎春色三分二分  
塵土一分流水細看來不是楊花點點是離人淚

張叔夏云

後片愈出愈奇  
真是壓倒今古

又黃州夢過  
樓霞樓

小舟橫截春江臥看翠壁紅樓起雲間笑語使君高會  
佳人半醉危柱哀絃艷歌餘響遏雲縈水念故人老大  
風流未減獨回首烟波裏推枕惘然不見但空江月  
明千里五湖聞道扁舟歸去仍携西子雲夢南州武昌  
南岸昔遊應記料多情夢裏端來見我也參差是

浣溪沙

遊蘄水  
清泉寺

山下蘭芽短浸溪松間沙路淨無泥瀟瀟暮雨子規啼  
誰道人生難再少君看流水尚能西休將白髮唱黃



雞寺前水  
西流

卜算子 鴈

缺月挂疎桐，漏斷人初定。

一作靜

時見幽人獨往來，縹緲

孤鴻影。驚起却回頭，有恨無人省。揀盡寒枝不肯栖，

寂寞沙洲冷。

黃魯直云：語意高妙，似非喫烟火食人語。

江城子

天涯流落思無窮，既相逢，却匆匆。攜手佳人，和淚折殘紅。為問東風餘幾許，春縱在，與誰同。隋堤三月水溶溶。

溶背歸鴻去吳中回望彭城清泗與淮通寄我相思千  
點淚流不到楚江東

念奴嬌

赤壁懷古

大江東去浪聲沉千古風流人物故壘西邊人道是三  
國孫吳赤壁亂石崩雲驚濤掠岸捲起千堆雪江山如  
畫一時多少豪傑遙想公瑾當年小喬初嫁了雄姿  
英發羽扇綸巾談笑間檣櫓灰飛烟滅故國神遊多情  
應是笑我生華髮人間如寄一尊還酹江月

按他本浪聲沉作浪

淘盡與調未協孫吳作周郎犯下公瑾字崩雲作穿空  
掠岸作拍岸又多情應是笑我生華髮作多情應笑我  
早生華髮益非今從容齋隨筆所載黃魯直手書  
本更正至于小喬初嫁宜句絕了字屬下句乃合

### 蝶戀花

春事闌珊芳草歇客裏風光又過清明節小院黃昏人  
憶別落花處處聞啼鴂咫尺江山分楚越目斷魂消  
應是音塵絕破夢五更心欲折角聲吹落梅花月

### 如夢令

有寄

為向東坡傳語人在畫

一作玉

堂深處別後有誰來雪壓

小橋無路歸去歸去江上一犁春雨

昭君怨

誰作桓伊三弄驚破綠窓幽夢新月與愁烟滿江天  
欲去又還不去明日落花飛絮飛絮送行舟水東流

點絳脣

重九

不用悲秋今年身健還高宴江村海甸總作空花觀  
尚想橫汾蘭菊紛相半樓船遠白雲飛亂空有年年鴈

採桑子

潤州多景樓  
與孫巨源遇

多情多感仍多病多景樓中樽酒相逢樂事回頭一笑  
空 停杯且聽琵琶語細撚輕攏醉臉春融斜照江天  
一抹紅

黃庭堅

字魯直分寧人舉進士元祐初為校書郎遷  
集賢校理擢右居舍人追謚文節有山谷詞

卷二

晁无咎云魯直小詞固  
高妙然不是當行家語

減字木蘭花

中秋無雨醉送月銜西嶺去笑口須開幾度中秋見月

來前年江外兒女傳杯兄弟會此夜登樓小謝清吟  
慰白頭

醜奴兒令

櫻桃著子如紅豆不管春歸聞道開時蜂惹香鬚蝶惹  
衣樓臺燈火明珠翠酒戀歌迷醉玉東西少箇人人  
暖被携

念奴嬌

斷虹霽雨淨秋空山染修眉新綠桂影扶疎誰便道今

夕清輝不足萬里清天姮娥何處駕此一輪玉寒光零  
亂為誰偏照醺醺年少從我追遊晚城幽徑遠張園  
森木共倒金荷家萬里難得樽前相屬老子平生江南  
江北最愛臨風曲孫郎微笑坐來聲歎霜竹

虞美人

宜州見  
梅作

天涯也有江南信梅破知春近夜闌風細得香遲不道  
曉來開遍向南枝玉臺弄粉花應妒飄到眉心住平  
生箇裏願盃深去國十年老盡少年心

# 秦觀

字少游高郵人登第後蘇軾薦於朝除太學博士遷正字兼國史院編修官坐黨籍徙徽

宗立放還至藤州卒有淮海詞三卷

晁无咎云近來作者皆不及少游如斜陽外寒鴉數點流水遠孤村雖不識字人亦知是天生好言語蔡伯世云子瞻辭勝乎情者卿情勝乎辭辭情相稱者惟少游而已張綖云少游多婉約子瞻多豪放當以婉約為主釋覺範云少游小詞奇麗詠歌之想見其神情在絳闕道山之間葉少蘊云少游樂府語工而入律知樂者謂之作家子瞻戲云山抹微雲秦學士露花倒影柳屯田微以氣格為病也

## 滿庭芳



山抹微雲天粘衰草畫角聲斷譙門暫停征棹聊共引  
離尊多少蓬萊舊事空回首烟靄紛紛斜陽外寒鴉數  
點流水遶孤村消魂當此際香囊暗解羅帶輕分謾  
贏得青樓薄倖名存此去何時見也襟袖上空染啼痕  
傷情處高城望斷燈火已黃昏

又

晚色雲開春隨人意驟雨方過還晴高臺芳樹飛燕蹴  
紅英舞困榆錢自落秋千外綠水橋平東風裏朱門映

柳低按小秦箏 多情行樂處珠鈿翠蓋玉轡紅纓漸  
酒空金盞花困蓬瀛豆蔻梢頭舊恨十年夢屈指堪驚  
凭欄久疎烟淡日寂寞下蕪城

望海潮

洛陽懷古

梅英疎淡水漸溶洩東風暗換年華金谷俊遊銅駝巷  
陌新晴細履平沙長記誤隨車正絮翻蜨舞芳思交加  
柳下桃蹊亂分春色到人家西園夜飲鳴笳有華燈  
礙月飛蓋妨花蘭苑未空行人漸老重來事事堪嗟烟

暝酒旗斜但倚樓極目時見棲鴉無奈歸心暗隨流水  
到天涯

如夢令

遙夜月明如水風緊驛亭深閉夢破鼠窺燈霜送曉寒  
侵被無寐無寐門外馬嘶人起

生查子

眉黛遠山長新柳開青眼樓閣斷霞明羅幙春寒淺  
盃嫌玉漏遲燭厭金刀剪月色忽飛來花影和簾卷

浣溪沙

漠漠輕寒上小樓。曉陰無賴似窮秋。淡烟流水畫屏幽。  
自在飛花輕似夢，無邊絲雨細如愁。寶簾閒挂小銀鉤。

減字木蘭花

天涯舊恨，獨自淒涼人不問。欲見迴腸，斷續薰爐小篆香。  
黛蛾長斂，任是東風吹不展。困倚危樓，過盡飛鴻字字愁。

憶秦娥

暮雲碧佳人不見愁如織愁如織兩行征雁數聲羌笛  
錦書難寄西飛翼無言只是空相憶空相憶紗窓月  
淡影雙人隻

阮郎歸

滿天風雨破寒初燈殘庭院虛麗譙吹徹小單于迢迢  
清夜徂鄉夢斷旅情孤崢嶸歲又除衡陽猶有雁傳  
書郴陽和雁無

好事近

夢中作

卷六

春路雨添花花動一山春色行到小橋深處有黃鸝千  
百飛雲當面化龍蛇天矯轉空碧醉卧古藤陰下了  
不知南北

畫堂春

東風吹柳日初長雨餘芳草斜陽杏花零亂燕泥香睡  
損紅妝寶篆烟消龍鳳畫屏雲鎖瀟湘暮寒初透薄  
羅裳無限思量

鵲橋仙

纖雲弄巧飛星傳恨銀漢迢迢暗度金風玉露一相逢  
便勝却人間無數柔情似水佳期如夢忍顧鵲橋歸  
路兩情若是久長時又豈在朝朝暮暮

虞美人

高城望斷塵如霧不見連鰲處夕陽村外小灣頭只有  
柳花無數送歸舟瓊枝玉樹頻相見只恨離人遠欲  
將幽恨寄青樓爭奈無情江水不西流

踏莎行

郴州旅舍

霧失樓臺月迷津渡桃源望斷無尋處可堪孤館閉春

寒杜鵑聲裏斜陽暮驛寄梅花魚傳尺素砌成此恨

無重數郴江幸自遶郴山為誰流下瀟湘去

釋天隱云末二句從

沅湘日夜東流去不為愁人住少時變化來

黃山谷

云此詞高絕但斜陽暮三字為重犯耳又曰極似劉夢

得楚蜀間語胡元任云子瞻絕愛尾兩

句自書于扇曰少游已矣雖萬身何贖

江城子

西城楊柳弄春柔動離憂淚難收猶記多情曾為繫歸



舟碧野朱橋當日事人不見水空流  
韶華不為少年  
留恨悠悠幾時休飛絮落花時候一登樓便做春江都  
是淚流不盡許多愁

八六子

倚危亭恨如芳草萋萋刻畫還生念柳外青驄別後水  
邊紅袂分時愴然暗驚  
無端天與娉婷夜月一簾幽

夢春風十里柔情怎奈何

一作向

歡娛漸隨流水素絃聲

斷翠綃香減那堪片片飛花弄晚濛濛殘雨籠晴正銷

凝黃鸝又啼數聲

金明池

瓊苑金池青門紫陌似雪楊花滿路雲日淡天低晝永  
過三點兩點細雨好花枝半出牆頭似悵望芳草王孫  
何處更水遠人家橋當門巷燕燕鶯鶯飛舞怎得東  
君長為主把綠鬢朱顏一時留住佳人唱金衣莫惜才  
子倒玉山休訴況春來倍覺傷心念故國情多新年愁  
苦縱寶馬嘶風紅塵拂面也只一作則尋芳歸去

水龍吟

小樓連苑橫空下  
窺繡轂雕鞍驟  
疎簾半捲  
單衣初試  
清明時候  
破暖輕風  
弄晴微雨  
欲無還  
有賣花聲過盡  
垂楊院落紅成陣  
飛鴛甃  
玉珮丁東  
別後悵佳期  
參差難又  
名韁利鎖  
天還知道  
和天也瘦  
花下重門柳邊  
深巷不堪回首  
念多情但有當時皓月照人依舊

南柯子

贈陶心兒

玉漏迢迢盡  
銀潢淡淡橫  
夢回宿酒未全醒  
已被鄰雞

催起怕天明 臂上妝猶在襟間淚尚盈水邊燈火漸

人行天外一鉤殘月照三星

高齋詩話云少游在蔡州與官奴婁婉字東玉者甚

密贈之詞云小樓連苑橫空又云玉珮丁東別後者是也又贈陶心兒詞云天外一鉤橫月帶三星謂心字也

晁補之

字无咎鉅野人舉進士元祐初除秘書省正字遷校書郎以秘閣校理通判揚州召還為

著作郎坐黨籍徙大觀末知

泗州卒有難助集詞一卷

陳質齋云无咎嘗云今代詞手惟秦七黃九然兩公之詞亦自有不同若无咎佳者固未

多遜也

滿江紅

東武城南新堤固連漪初溢隱隱遍長陵高阜臥紅堆  
碧枝上殘花吹盡也與君試向江邊覓問向前猶有幾  
多春三之一 官裏事何時畢風雨外無多日相將泛  
曲水滿城爭出不見蘭亭修禊事當時座上皆豪逸到  
如今脩竹滿山陰空陳迹

臨江仙

信州作

謫宦江城無屋買殘僧野寺相依松間藥臼竹間衣水  
窮行到處雲起坐看時 一箇幽禽緣底事苦來醉耳

邊啼月斜西院愈聲悲青山無限好猶道不如歸

又

綠暗汀洲三月暮落花風靜帆收垂楊低映木蘭舟半  
篙春水滑一段夕陽愁  
灞水橋東回首處美人親上  
簾鉤青鸞無計入紅樓行雲歸楚峽飛夢到揚州

永遇樂

東臯  
寓居

松菊堂深芰荷池小長夏清暑燕引雛還鳩呼婦往人  
靜郊原趣麥天已過薄衣輕扇試起遶園徐步聽衡宇

欣欣童稚共說夜來初雨  
蒼苔徑裡紫葳枝上數點  
幽花垂露東里催鋤西鄰助餉相戒清晨去斜川歸興  
翛然滿目回首帝鄉何處只愁恐輕鞍犯夜灞陵舊路  
摸魚兒

買陂塘旋栽楊柳依稀淮岬湘浦東皋雨足輕痕漲沙  
菰鷺未鷗聚堪愛處最好是一川夜月光流渚無人自  
舞任翠幕張天柔茵藉地酒盡未能去青綾被休憶  
金閨故步儒冠曾把身誤弓刀千騎成何事荒了邵平

瓜圃君試覩滿青鏡  
星星鬢影今如許  
功名浪語便做得  
班超封侯萬里歸  
計恐遲暮

憶少年

無窮官柳無情盡  
舸無根行客南山尚相送  
只高城人隔  
晝盡園林溪紺碧  
筭重來盡成陳迹  
劉郎鬢如此  
況桃花顏色

下水船

上客驪駒繫驚喚  
銀餅睡起困倚妝臺  
盈盈正解羅髻



鳳釵墜繚繞金盤玉指巫山一段雲委半窺鏡向我  
橫秋水斜領花枝交鏡裏淡拂鉛華匆匆自整羅綺斂  
眉翠雖有惜惜密意空作江邊解珮能改齋漫錄廖明畧與无咎同登科  
明畧所游田氏麗姝也一日明畧邀无咎晨過田氏田  
遽起對鑑理髮且盼且語草草妝掠以與客對无咎以  
明畧故有意而莫傳也因賦下水船一闋

滿庭芳

赴信日舟中別次膺十二叔

鷗起蘋中魚驚荷底畫船天上来時翠灣紅渚宛似武  
陵迷向晚青山更好孤雲帶遠雨絲垂清歌裡金尊未

掩誰使動分携 竹林高晉阮阿咸瀟散猶愧風期便  
棄官終隱釣叟苔磯縱是冥鴻雲外應念我垂翼低飛  
新詞好他年認取天際片帆歸

迷神引

貶玉溪對  
江山作

黯黯青山紅日暮浩浩大江東注餘霞散綺回向烟波  
路使人愁長安遠在何處幾點漁燈小迷近塢一片客  
帆低傍前浦 暗想平生自悔儒冠誤覺阮途窮歸心  
阻斷魂縈目一千里傷平楚怪竹枝歌聲聲怨為誰苦

猿鳥一時啼驚鳥嶼燭暗不成眠聽津鼓

古陽關

寄無數人  
弟辛寶應

衰草蛩吟咽暗柳螢飛滅空庭雨過西風緊飄黃葉卷  
書帷寂靜對此傷離別重感歎中秋數日又圓月沙  
觜橋竿上淮水濶有飛鳧客詞珠玉氣冰雪且莫教皓  
月照影驚華髮問幾時清樽夜景共佳節

好事近

南都寄  
歷下人

絲管闌南湖湖上醉遊時晚獨看山橋官柳淚無言偷

滿坐中誰唱解愁詞紅妝勸金盞物是奈人非是負  
東風心眼

水龍吟

始去齊路逢次  
膺叔感別叙舊

去年暑雨鉤盤夜闌睡起同征轡今年芳草齊河古岼  
扁舟同艤萍梗孤蹤夢魂浮世別離常是念當時綠鬢  
狂歌痛飲今憔悴東風裏此去濟南為說道愁腸不  
醒猶醉多情北渚兩行烟柳一湖春水還唱新聲後人  
重到應悲桃李待歸時攬取庭前皓月也應堪寄

惜奴嬌

歌闌瓊筵暗失金貂侶說衷腸丁寧囑付棹舉帆開黯  
行色秋將暮欲去待却回高城已暮漁火烟村但觸  
目傷離緒此情向阿誰分訴那裏思量爭知我思量苦  
最苦睡不著西風夜雨

鬪百花

小小盈盈珠翠憶得眉長眼細曾共映花低語已解傷  
春情意重向溪堂臨風看舞梁州依舊照人秋水轉更

添姿媚 與問階上簌錢時節記微笑但把纖腰向人  
嬌倚不見還休誰教見了厭厭還是向來情味

調笑

西子

腸斷越江岸越女江頭紗自浣天然玉貌鉛紅淺自  
美芙蓉日晚紫騮嘶去猶回眄笑入荷花不見

張耒

字文潛淮陰人第進士歷官起居舍人以直  
龍圖閣知潤州坐黨籍謫官晚監南嶽廟主

管崇福宮建炎初贈集  
英殿修撰有宛丘集

風流子

亭皋木葉下重陽近又是搗衣秋奈愁入庾腸老侵潘  
鬢謾簪黃菊花也應羞楚天晚白蘋烟盡處紅蓼水邊  
頭芳草有情夕陽無語雁橫南浦人倚西樓 玉容知  
安否香箋共錦字兩處悠悠空恨碧雲離合青鳥沈浮  
向風前懊惱芳心一點寸眉兩葉禁甚閒愁情到不堪  
言處分付東流

少年遊

含羞倚醉不成歌纖手掩香羅偎花映燭偷傳深意酒

思入橫波 看朱成碧 心迷亂翻 脈脈斂雙蛾 相見時  
稀 隔別多 又春盡 奈愁何

秋藥香

簾幙疎疎 風透一線香 飄金獸朱欄倚遍 黃昏後廊上  
月華如畫 別離滋味濃如酒 著人瘦 此情不及牆東  
柳 春色年年依舊

陳師道

字履常 一字無已 彭城人 元祐初以蘇軾等薦為徐州教授 遷太學博士 終秘書省正字

有後山集長短句二卷



胡元任云後山自謂他文未能及人  
獨於詞不減秦七黃九其自矜如此

菩薩蠻 箏

哀箏一弄湘江曲  
聲聲寫盡湘波綠  
纖指十三絃  
細將幽恨傳  
當筵秋水慢  
玉柱斜飛鴈  
彈到斷腸時  
春山眉黛低

減字木蘭花

晁无咎出  
小鬟佐飲

娉娉嫋嫋芍藥枝  
頭紅樣玉

一作玉

小舞袖低迴

一作遲遲

心到

郎邊客已知  
金尊玉

一作當筵舉

酒勸我花前  
千萬壽莫

莫休休白髮簪花我自羞

李

廌

字方叔華山人鄉舉試禮部不遇  
絕意進取定居長社有月巖集

清平樂

落梅鳴咽黯澹城頭月吹滿江天驚夢蛭喚起畫樓傷  
別 簾風輕觸銀鈎梧桐玉露新秋底事瑣窓深夜素  
娥長伴人愁

虞美人

玉闌干外清江浦渺渺天涯雨好風如扇雨如簾時見

岸花汀草漲痕添 青林枕上闕山路卧想乘鸞處碧  
蕪千里思悠悠惟有霎時涼夢到南州

李之儀

字端叔無棣人歷樞密院編修官通判原州  
徽宗初提舉河東常平坐為范純仁遺表作  
行狀編管太平遂居姑熟久之徙  
唐州終朝請大夫有姑溪詞二卷

卜算子

我住長江頭君住長江尾日日思君不見君共飲長江  
水此水幾時休此恨何時已只願君心似我心定不  
負相思意

如夢令

回首蕪城舊苑還是翠深紅淺春意已無多斜日滿簾  
飛燕不見不見門掩落花庭院

清平樂

蕭蕭風葉似與更聲接欲寄明璫非為怯夢斷蘭舟桂  
楫學書但寫鴛鴦却應無那愁腸安得一雙飛去春  
風芳草池塘

好事近

春到雨初晴正在小樓時節柳眼向人微笑傍闌不堪  
折暮山濃淡鎖煙霏梅杏半明滅玉笋莫辭沈醉判  
歸時斜月

詞綜卷六

詞綜卷七

翰林院檢討朱彝尊編

宋詞六十二首

賀鑄九首

毛滂二十首

王仲一首

杜安世三首

李元膺四首

孫洙一首

朱服一首

章棗一首

舒亶二首

李清臣一首

王 詵 二首

趙令時 二首

王安禮 一首

王安國 二首

曾 肇 一首

晁沖之 五首

秦 觀 一首

王 觀 五首

賀

鑄

字方回衛州人孝惠皇后族孫元祐中通判泗州又倅太平州退居吳下自號慶湖遺老

有東山寓聲

樂府三卷

張文潛云方回樂府妙絕一世盛麗如遊金張之堂妖冶如攬嬌施之袪幽索如屈宋悲壯如蘇李周少隱云方回有梅子黃時雨之句人謂之賀梅子方回寡髮郭功父指其



髻謂曰此真賀梅子也 陸務觀云方回狀貌奇醜俗謂之賀鬼頭其詩文皆高不獨工長短句也

### 薄倖

淡妝多態更滴滴頻迴盼睐便認得琴心先許欲綰合歡雙帶記畫堂風月逢迎輕顰淺笑嬌無奈待翡翠屏開芙蓉帳掩羞把香羅暗解 自過了燒燈都不見踏青挑菜幾回憑雙燕丁寧深意往來却恨重簾礙約何時再正春濃酒困人間晝永無聊賴厭厭睡起猶有花

梢日在

青玉案

凌波不過橫塘路。但目送、芳塵去。錦瑟年華誰與度。月臺花謝，瑣窓朱戶，惟有春知處。碧雲冉冉蘅皋暮。綵筆新題斷腸句。試問閒愁都幾許。一川烟草，滿城風絮，

梅子黃時雨

中吳紀聞云：鑄有小築在姑蘇盤門之內，十餘里地名橫塘。方回往來其間，作此詞。

後山谷有詩云：解道江南腸斷句，只今惟有賀方回。其為前輩推重如此。

潘子真云：寇萊公詩：杜鵑啼處血

成花。梅子黃時雨，如霧。世推方回所作。梅子黃時雨，為絕唱。蓋用萊公語也。

柳色黃

薄雨催寒斜照弄晴春意空濶長亭柳色纔黃遠客一枝先折烟橫水際映帶幾點歸鴉東風消盡龍沙雪還記出門時一作關來恰而今時節將發畫樓芳酒紅淚清

歌頓

一作便

成輕別已是經年杳杳音塵都絕欲知方寸

共有幾許清愁芭蕉不展丁香結枉望斷天涯兩厭厭

風月

能改齋漫錄方回春一姝別久姝寄詩云獨倚危欄淚滿襟小園春色懶追尋深恩縱似丁香結難

展芭蕉一寸心賀因所寄詩遂成此調

清平樂

小苑初謝雙燕還來也記得年時寒食下紫陌青門遊  
冶楚城滿目春華可堪遊子思家惟有夜來歸夢不  
知身在天涯

望湘人

厭鶯聲到枕花氣動簾醉魂愁夢相半被惜餘熏帶驚  
剝眼幾許傷春春晚淚竹痕鮮佩蘭香老湘天濃暖記  
小江風月佳時屢約非烟游伴須信鸞絃易斷奈雲

和再鼓曲終人遠認羅襪無踪舊處弄波清淺青翰棹  
艤白蘋洲畔儘目臨臯飛觀不解寄一字相思幸有歸  
來雙燕

踏莎行

急雨收春斜風約水浮紅漲綠魚文起年年遊子惜餘  
春春歸不解招遊子留恨城隅關情紙尾闌干長對  
西曠倚鴛鴦俱是白頭時江南渭北三千里

憶秦娥

曉朦朧前溪百鳥啼  
匆匆啼匆匆凌波人去拜月樓空  
舊年今日東門東  
鮮妝輝映桃花紅  
桃花紅吹開吹落  
一任東風

又桑

著春衫玉鞭鞭馬南城南  
南城南桑桑細草留住金銜  
粉蛾采葉共親蠶  
蠶饑略許携纖纖  
携纖纖前裙淇  
上更待初三

感皇恩

蘭芷滿汀洲，游絲橫路羅襪塵生步。迴顧整鬟顰黛，脈脈多情難訴。細風吹柳絮，人南渡。回首舊游山無重數。花底深朱戶，何處半黃梅子向晚一簾疎雨，斷魂分付與春歸去。

毛滂

字澤民，江山人。為杭州法曹，以樂府受知。蘇軾得名，嘗知武康縣，又知秀州，有東堂詞二

卷

浣溪沙

泛舟還餘英館

烟柳風蒲冉冉斜，小窓不用著簾遮。載將山影轉灣沙。

略約斷時分岼色蜻蜓立處過汀花此情此水共天涯

又

寒食初晴  
東堂對酒

小雨初收蜨做團和風輕拂燕泥乾秋千院落落花寒  
莫對清尊追往事更催新火續餘歡一春心緒倚闌干

又

汎舟

銀字笙簫小小童梁州吹過柳橋風阿誰勸我玉杯空



小醉徑須眠錦瑟夜歸不用照紗籠  
畫船簾卷月明中

惜分飛

淚溼闌干花著露愁到眉峰碧聚此恨平分取更無言  
語空相覩  
斷雨殘雲無意緒寂寞朝朝暮暮今夜山

深處斷魂分付潮回去

陳質齋云澤民他詞維工未有能及此者周煥云語盡而意

不盡意盡而情不盡

踏莎行

早春即事

階影紅遲柳苞黃遍纖雲弄日陰晴半重簾不卷篆香  
橫小花初破春叢淺鳳繡猶重鴨爐長暖屏山翠入  
江南遠醉輕夢短枕閒歌綠窓窈窕風光轉

蜨戀花 寒食

紅杏梢頭寒食雨燕子泥香不住飛來去行傍柳陰聞  
好語鶯兒穿過黃金縷桑落酒寒杯懶舉總被多情  
做得無情緒春過二分能幾許銀臺新火重簾暮

驀山溪 楊花

雪堂瓊徑撲撲憐飛絮柔弱不勝春任東風吹來吹去  
牆陰花外一半落誰家葉依依烟鬱鬱依舊如張緒  
那人拈得吹向釵頭住不定却飛揚滿眼前攪人情悵  
蜂兒蜨子教得越輕狂隔斜陽點芳草斷送青春暮

燭影搖紅

松窓午夢初覺

一畝清陰半天小雨松窓午牀頭秋色小屏山碧帳垂  
烟縷枕畔風搖綠戶喚人醒不教夢去可憐恰到瘦  
石寒泉冷雲生處

粉蜨兒

雪徧梅花素光都共奇絕到窓前認君時節下重幃香  
篆冷蘭膏明滅夢悠揚空遶斷雲殘月沈郎帶寬同  
心放開重結褪羅衣楚腰一捻正春風新著摸花花葉  
葉粉蜨兒這回共花同活

最高樓

微雨過深院菱荷中香冉冉繡重重玉人共倚闌干角  
月華猶在小池東入人懷吹鬢影可憐風分散去輕

如雲與葉剝下了許多風與月侵枕簟冷簾櫳剛能小  
睡還驚覺略成輕醉早惺忪仗行雲將此恨到眉峰

玉樓春

肝胎作

長安回首空雲霧春夢覺來無覓處冷烟寒雨又黃昏  
數盡一堤楊柳樹楚山照眼青無數淮口潮生催曉  
渡西風吹面立蒼茫欲寄此情無雁去

青玉案

芙蓉花上濛濛雨又冷落池塘暮何處風來搖碧戶捲

簾凝望淡烟疎柳翡翠穿花去  
玉京人去無由駐忍  
獨在凭欄處試問綠窓秋到否  
可人今夜新涼一枕無  
計相分付

七娘子

舟中  
早秋

山屏霧帳玲瓏碧更綺窓臨水新涼入  
雨短烟長柳橋  
蕭瑟這番一日涼一日  
離多綠鬢多時白  
這離情不  
似而今惜雲外長安斜暉脈脈西風吹夢來無跡

西江月

烟雨半藏楊柳風光初著桃花玉人細細酌流霞醉裏  
將春留下 柳外鴛鴦作伴花邊蝴蝶為家醉翁醉也  
且由他月在柳橋花榭

夜行船

餘英溪

弄水餘英溪畔綺羅香日遲風慢桃花春浸一篙深畫  
橋東柳低烟遠 漲綠流紅空滿眼倚蘭橈舊愁無限  
莫把鴛鴦驚飛去要歌時少低檀板

憶秦娥

春夜  
松軒

夜夜夜了花朝也連忙指點銀瓶索酒嘗  
明朝花落知多少莫把殘紅掃愁人一片花飛減却春

散餘霞

牆頭花口寒猶噤放繡簾晝靜簾外時有蜂兒趁楊花  
不定闌干又還獨凭念翠低眉暈春夢枉惱人腸更  
厭厭酒病

調笑

盼盼

無力倚瑤瑟罷舞霓裳今幾日樓空雨小春寒逼鈿暈



羅衫烟色簾前歸燕看人立却赴落花飛入

又鶯鶯

何處長安路不記牆東花拂樹瑤琴理罷霓裳譜依舊  
月窓風戶薄情年少如飛絮夢逐玉環西去

又君子

芳草恨春老自是尋春來不早落花風起紅多少記得  
一枝春小綠陰青子空相惱此恨平生懷抱

感皇恩

鎮江  
待閑

綠水小河亭朱欄碧甃江月娟娟上高柳畫樓縹緲盡  
挂窓紗簾繡月明知我意來相就銀字吹笙金貂取  
酒小小微風弄襟袖寶熏濃炷人共博山烟瘦露涼釵  
燕冷更深後

王仲

字與善吳虎臣  
云元祐間人

燭影搖紅

烟雨江城望中綠暗花枝少惜春長待醉東風却恨春  
歸早縱有幽歡會巧奈如今風情漸老鳳樓何處畫

欄愁倚天涯芳草

杜安世

字壽域京兆  
人有詞一卷

折紅梅

喜輕澌初綻微和漸入郊原時節春消息夜來陡覺紅  
梅數枝爭發玉溪仙館不似箇尋常標格化工別與一  
種風情似勻點胭脂染成香雪重吟細閱比繁杏天  
桃品流終別只愁共綵雲易散冷落謝池風月憑誰向  
說三弄處龍吟休咽大家留取時倚闌干聞有花堪折

金  
卷七  
勸君須折

鶴沖天

清明天氣永日愁如醉臺榭綠陰濃薰風細燕子巢方就  
盆池小新荷蔽恰是逍遙際單夾衣裳半籠軟玉肌體  
石榴美艷一撮紅綃比窓外數脩篁寒相倚有箇  
關心處難相見空凝睇行坐深閨裡懶更妝梳自知新  
來憔悴

卜算子

樽前一曲歌歌裏千重意纔欲歌時淚已流恨更多於  
淚試問緣何事不語渾如醉我亦情多不忍聞怕和  
我成憔悴

李元膺

南京  
教官

洞仙歌

雪雲散盡放曉晴庭院楊柳於人便青眼更風流多處  
一點梅心相映遠約略顰輕笑淺一年春好處不在  
濃芳小艷疎香最嬌軟到清明時候百紫千紅花正亂

已失春風一半早占取韶光共追游但莫管春寒醉紅  
自暖

又雨

廉纖細雨殢東風如困縈斷千絲為誰恨向楚宮一夢  
多少悲涼無處問愁到而今未盡分明都是淚泣柳  
沾花長與騷人伴孤悶記當年得意處酒力方酣怯輕  
寒玉爐香潤又豈識情懷苦難禁對點滴簷聲夜寒燈  
暈

茶瓶兒 悼亡

去年相逢深院宇  
海棠下曾歌金縷  
歌罷花如雨  
翠羅衫上點點紅無數  
今歲重尋攜手處  
空物是人非春暮  
回首青門路  
亂英飛絮相逐東風去

思佳客

寂寞秋千兩畫旗  
日長花影轉階遲  
燕驚午夢週遮語  
蜨困春遊落拓飛  
思往事入顰眉  
柳梢陰重又當時  
薄情風絮難拘束  
吹過東牆不肯歸

孫洙

字巨源廣陵人舉進士  
元豐中官翰林學士

菩薩蠻

記恨

樓頭尚有三通鼓何須抵死催人去上馬苦匆匆琵琶  
曲未終 回頭凝望處那更廉纖雨謾道玉為堂玉堂

今夜長

黃叔暘云孫公於元豐間為翰林與李端愿太  
尉往來尤數會一日鎖院宣召者至其家則出

數十輩蹤跡得之于李氏時李新納妾能琵琶公飲不  
肯去而迫于宣命入院幾二鼓矣遂草三制罷復作此  
長短句以記別恨  
遲明遣以示李

朱

服

字行中烏程人熙寧中進士甲科累官國子  
司業起居舍人以直龍圖閣知潤州徙象婺



寧廬壽五州紹聖初召為中書舍人歷禮部侍郎坐與蘇軾游貶海州團練副使斬州安

置改興國軍卒

漁家傲

東陽郡齋作

小雨纖纖風細細萬家楊柳青烟裏戀樹濕花飛不起  
愁無際和春付與東流水九十光陰能有幾金龜解  
盡留無計寄語東陽沽酒市拚一醉而今樂事他年淚

章 柰

字質夫浦城人以蔭為孟州司戶參軍試禮部第一以平夏州功累擢樞密直學士龍圖閣

端明殿學士拜同知樞密院事卒贈右銀青光祿大夫謚莊簡揮塵錄作莊敏

水龍吟 柳花

燕忙鶯懶芳殘正堤上柳花飄墜輕飛亂舞點畫青林  
全無才思閑趁游絲靜臨深院日長門閉傍珠簾散漫  
垂垂欲下依前被風扶起 蘭帳玉人睡覺怪春衣雪

沾瓊綴繡牀漸滿香毬無數才圓却碎時見蜂兒仰粘  
輕粉魚吞池水望章臺路香金鞍游蕩有盈盈淚

黃叔暘云

傍珠簾數語  
形容盡矣

舒 亶

字信道慈谿人試禮部第一累官御史丞  
以罪斥終直龍圖閣待制卒贈直學士

菩薩蠻

畫船撾鼓催君去，高樓把酒留君住。去住若為情，江頭潮欲平。江潮容易得，却是人南北。今日此尊空，知君

何日同

黃叔暘云此詞極有味

散天花

雲斷長空落葉秋，寒江烟浪盡，月隨舟。西風偏解送離愁，聲聲南去鴈，下汀洲。無奈多情去後留，驪歌齊唱罷，淚爭流。悠悠別恨幾時休，不堪殘酒醒，凭危樓。

李清臣

字邦直魏人舉進士歷官知制誥翰林學士  
遷尚書左丞罷為資政殿學士尋拜中書侍  
郎以大學士知河南府徽宗初立入為門  
下侍郎出知大名府卒贈金紫光祿大夫

謁金門

楊花落燕子橫穿朱閣苦恨春醪如水薄閒愁無處著  
綠野帶紅山落角桃杏參差殘萼歷歷危檣沙外泊  
東風晚來惡

王詵

字晉卿太原人徙開封尚英宗女魏國大長  
公主歷官定州觀察使開國公駙馬都尉贈  
昭化軍節度使謚榮安

黃魯直云晉卿樂府清麗幽遠工在江南諸賢季孟之間

### 憶故人

燭影搖紅向夜闌乍酒醒心情懶尊前誰為唱陽關離恨天涯遠無奈雲沉雨散凭闌干東風淚眼海棠開

後燕子來時黃昏庭院

能改齊漫錄却耐憶故人作幾宗喜其詞意猶以不疊容宛轉

為憾遂令大晟府別撰腔周美成增益其詞而以首句為名謂之燭影搖紅云

按原詞甚佳美成增益真所謂續鳧

為鶴也

### 撼庭竹

綽略青梅弄春色真艷態堪惜經年費盡東君力有情  
先到探春客無語泣寒香時暗度瑤席月下風前空  
悵望思攜手同摘畫欄倚遍無消息佳辰樂事再難得  
還是夕陽天空暮雲凝碧

趙令時

字德麟燕懿王玄孫元祐中簽書潁州公事  
歷右朝請大夫改右監門衛大將軍營州防

禦使遷洪州觀察使襲封安定郡王尋遷寧  
遠軍承宣使同知行在大宗正事贈開府儀

同三司有  
聊復集

蝶戀花

欲減羅衣寒未去不卷珠簾人在深深處殘杏枝頭花  
幾許啼紅止恨清明雨盡日水沈香一縷宿酒醒遲  
惱破春情緒飛燕又將歸信誤小屏風上西江路

烏夜啼

樓上縈簾弱絮牆頭礙月低花年年春事關心事腸斷  
欲棲鴉舞鏡鸞衾翠減啼珠鳳蠟紅斜重門不鎖相  
思夢依舊一作隨意繞天涯

王安禮

字和甫安石弟  
累官尚書左丞

點絳脣

秋氣微涼夢迴明月穿羅幕井梧蕭索正遶南枝鵲

寶瑟塵生金雁空零落情無托鬢雲慵掠不似君恩薄

王安國

字平甫安石弟舉進士又舉茂才異等熙寧初除西京國子教授終秘閣校理有王校理

集

清平樂

留春不住費盡鶯兒語滿地殘紅宮錦污昨夜南園風  
雨小憐初上琵琶曉來思遶天涯不肯畫堂朱戶春



風自在楊花

減字木蘭花

畫橋流水雨溼落紅飛不起月破黃昏簾裡餘香馬上  
聞徘徊不語今夜夢魂何處去不似垂楊猶解飛花  
入洞房

曹肇

字子開南豐人舉進士累官翰林學士兼侍  
讀以龍圖閣學士提舉中太一宮崇寧中安  
置汀州歸潤而卒紹興

初謚文昭有曲阜集

好事近

亳州秋滿歸江  
南別諸僚舊

歲晚鳳山陰看盡楚天冰雪不待牡丹時候又使人輕  
別如今歸去老江南扁舟載風月不似畫梁雙燕有  
重來時節

晁沖之

字叔用一字用道鉅野  
人有具茨集詞一卷

感皇恩

蝴蝶滿西園啼鶯無數水閣橋南路凝竚兩行烟柳吹  
落一池風絮秋千斜挂起人何處把酒勸君閒愁莫  
訴留取笙歌住休去幾多春色怎禁許多風雨海棠花

謝也君知否

又

寒食不多時牡丹初賣小院重簾燕飛礙昨宵風雨尚  
有一分春在今朝猶自得陰晴快熟睡起來宿醒微  
帶不惜羅襟揜眉黛日長梳洗看看花影移改笑拈雙  
杏子連枝戴

臨江仙

憶昔西池池上飲年年多少歡娛別來不寄一行書尋

常相見了猶道不如初  
安穩錦屏今夜夢月明好渡  
江湖相思休問定何如  
情知春去後管得落花無

上林春慢

上元

帽落宮花衣惹御香鳳輦晚來初過  
鶴降詔飛龍銜一作  
擎燭戲端門萬枝燈火滿城車馬對  
明月有誰閒坐任

狂游更許傍禁街不局金鎖  
玉樓人暗中擲果珠簾  
下笑著春衫裊娜素蛾遶釵輕蟬撲  
鬢垂垂柳絲梅朶  
夜闌飲散但贏得翠翹雙暉醉歸來  
又重向曉窓梳裹

傳言玉女 前題

一夜東風吹散柳梢殘雪御樓烟暖對鰲山綵結簫鼓  
向晚鳳輦初回宮闕千門燈火九衢風月 繡閣人人  
乍嬉遊困又歇艷妝初試把珠簾半揭嬌波溜人手燃  
玉梅低說相逢長是上元時節

秦觀

字少章  
觀弟

黃金縷

足司馬才仲夢  
中蘇小小詞

妾本

一作在

錢塘江上住花落花開不管

一作記

流年度燕

子銜將春色去紗窓幾陣黃梅雨

一作黃昏幾度滿滿雨

斜揷

一作蟬鬢

犀梳雲半

一作欲

吐檀板輕敲

一作新聲

唱徹黃金縷夢

斷綵雲

一作酒醒夢回

無覓處夜

一作淒

涼明月生南浦

王

觀

字通叟官翰林學士賦應制詞宣仁太后以其近褻謫之自歸遂客一云官大理寺丞知

江都縣事有冠柳集一卷

黃叔暘云通叟詞名冠柳至踏青一詞風流楚楚又不獨冠柳詞之上也

陳質齋云遂

客詞格不高以冠柳自名則可見矣

清平樂

應制

黃金殿裏燭影雙龍戲勸得官家真箇醉進酒猶呼萬  
歲折旋舞徹伊州君恩與整搔頭一夜御前宣住六  
宮多少人愁

者舊續聞作王仲甫字明之按  
王介字仲甫衢州人好為助語詩

慶清朝慢

踏青

調雨為酥催冰做水東君分付春還何人便將輕暖點  
破殘寒結伴踏青去好平頭鞋子小雙鸞烟郊外望中  
秀色如有無間晴則箇陰則箇餽飭得天氣有許多  
般須教撩花撥柳爭要先看不道吳綾繡襪香泥斜沁

幾行斑東風巧盡收翠綠吹上眉山

菩薩蠻

單于吹落山頭月漫漫江上沙如雪誰唱縷金衣水寒  
船舫稀蘆花楓葉浦憶抱琵琶語身未發長沙夢魂  
先到家

生查子


關山魂夢長塞雁音書少兩鬢可憐青一夜相思老  
歸傍碧紗窓說與人人道真箇別離難不似相逢好



臨江仙

別浦相逢何草草扁舟兩岼垂楊繡屏珠箔綺香囊酒  
深歌拍緩愁入翠眉長燕子歸來人去也此時無奈  
昏黃桃花應似我柔腸不禁微雨流淚溼紅妝

詞綜卷七



總校官庶吉士臣張能照  
校對官中書臣潘庭筠  
謄錄監生臣姚元娘